

Peqqissaaveqarfiup Qullersaqarfianut naammagittaalliuteqarsinnaavutit

- naammagittaalliummi makku pineqarpata:

- Peqqinnissaqarfiup kiffartuussinera
- Sulisut pissusilersornerat, ulapippallaarnerat assigisaallu
- Napparsimasunik angallassinermut atatillugu ajornartorsiutit
- Nakorsartitsinermi ammasarfiit
- Utaqqisarnerit
- Katsorsarneqarnissamut periarfissaqannginneq
- Oqaatsitigut oqalutseqarniarnikkullu ajornartorsiutit

Naammagittaalliut sumut nassiunneqassava?

Naammagittaalliutiginiagaq Dronning Ingridip Napparsimmavissuani, nakorsartarfianiluunnit imaluunniit Kalaallit peqqissartut Illuanni Brønshøjimiittumi pisimappat, kigutileriffimmi imaluunniit, sinerissami napparsimmaviit arlaanni pisimappat, uunga naammagittaalliuteqassaait:

Peqqinnissaqarfiup Qullersaqarfia

Postboks 1001

3900 Nuuk

Oqarasuaat: 34 40 00 - Telefax: 34 43 33

Qaqugukkut naammagittaalliuteqartoqassava?

Naammagittaalliutiginiakkap pinerata kingunitsiannua piaarnerpaamik naammagittaalliut tunniunneqartariaqarpoq. Naammagittaalliutip misissorluarneqarnissaa pissutigalugu taamaasiornissaq pisariaqarpoq. Naammagittaalliutiginiagaq pisoqalereersimagaangat sulisut naamma-

gittaalliutiginiakkamut attuumassutillit eqqaamaniarnerat ajornartorsiutaasinnaasarpog imaluunniit suliffimmut allamut nuuttoqareersimasinnaasarluni, taamaattumillu naammagittaalliutigineqartup misissornissaa ajornartorsiutaasinnaalluni.

Naammagittaalliut sunik imaqaassava?

Naammagittaalliutit suliarisinnaassagutsigu paasissutissanik makkuninnga imaqartariaqarpoq:

- Atit najukkallu, inuttullu normut
- Naammagittaalliutiginiakkavit suuneranik nassuiaat
- Naammagittaalliutiginiakkavit sumi qangalu pineranik nassuiaat

Naammagittaalliutiginiakkannut attuumassutillit inuit aqqi eqqaamasinnaagukkit tamanna naammagittaalliutip paasiniaaffigineqarneranut iluaqutaassaaq.

Alla sinnerlugu naammagittaalliortoqarsinnaava?

Meeqqat 18-it inorlugit ukioqarpata taakku sinnerlugit angajoqqaat naammagittaalliorsinnaapput. Paaqqutallit paaqqutartik sinnerlugu naammagittaalliorsinnaapput. Alla sinnerlugu naammagittaalliuteqassaguit piginnaatitsissut atsiugaq ilan-ngullugu nassiutissavat. Taanna aamma atuuppoq qanigisat suli peqqissut, soorlu angajoqqaat, qitornat inersimasut, aappaq imaluunniit inooqat pineqartillugit. Tamatumunnga pissutaavoq naammagittaalliutit suliasanngortinneqartut inunnut ataasiakkaanut pissutsinullu isertuuttariaqartunut, pineqartut akuersisimatinnagit peqqinnissaqarfiup oqaaseqarfigisinnaanngisaanut tunngassuteqakkajummata.

Naammagittaalliortinnak

Naammagittaalliortinnak naammagittaalliutiginiakkat sulisunut oqaloqatigiissutigisinnaanerlugu eqqarsaatigeqqaartariaqarpat. Misigisimavit sulisumik imaluunniit tassani pisortaasumik oqaloqateqarnikkut saqqummiunnissaanut pisinnaatitaaffeqarputit. Taamaasioorneq pissutsinik pilertortumik sunniuteqartumillu iluarsiiffiussinnaavoq qanoq pisoqarsimaneranilluunniit paasinniffiulluni. Sulisut iluarisarpaat suliaminut atatillugu isummaminnik saqqummiinissaminnut periarfissinneqaraangamik, taamaasillutillu aqqittariaqarunnartunik namminneerlutik iluarsisinnaagaangamik. Oqaloqatigiinneq ilinnut naammaginangippat allakkatigut naammagittaalliorsinnaatitaanerit annaanaviangilat.

Naammagittaalliornissamut periarfissat allat

Misigisimaguit eqqunngitsumik pineqarsimallutit, naammaginangitsumik misissorneqarsimallutit imaluunniit tamakku assigisaannik naammaginartumik sullinneqarsimanak, taava naammagittaalliutiginiakkat Nunatsinni Nakorsaaneqarfimmut tunniunneqassaaq. Naammagittaalliut misissorneqassaaq Peqqinnissaqarfiullu Napparsimasut Sullinneqarneranni Maalaaruteqartarfianut aalajangiiffigisassatut ingerlateqqinneqarluni. Tamanna erseqqinnerusumik paasisaqarfigisinnaavat quppersakkami uani „*Ima naammagittaalliorsinnaavutit Peqqinnissaqarfiup Napparsimasut Sullinneqarneranni Maalaaruteqartarfianut*“.

Ima naammagittaalliorsinnaavutit



**Peqqinnissaqarfiup
Qullersaqarfia**

**Peqqinnissamut tunngasut naammagittaalli-
utigineqartarneranni ilitersuut
Ilaqutariinnermut Peqqissutsimullu
Naalakkersuisoqarfimmit 2008-mi
saqqummersinneqartoq**